



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorm Omnium Generalium Et Provincialium Collectio Regia

Ab anno MCLXXXI. ad annum MCCCXIV.

Parisiis, 1644

Concilium Mogvntinum, Qvo Svb Praesidio Petri Mogvntini archiepiscopi
iussu pontificis tractata est causa Templariorum, anno Domini MCCCX.
tempore Clementis papae V.

urn:nbn:de:hbz:466:1-15974

ANNO
CHRISTI
1310.

MITIGATIO SEV MUTATIO

pœnæ super capitulum,

Contractibus matrimoniorum.

SALVTI animarum paterna sollicitudine cauere volentes, constitutionem de clandestinis matrimoniis dudum per nos editam, quæ incipit, Contractibus matrimoniorum, &c. taliter ex certis causis duximus moderandam.

Hæc moderatio, seu mitigatio non est in codice Canoniano.

Tollimus quidem, & sublatam esse decernimus, pœnam excommunicationis, quoad omnes articulos constitutionis eiusdem, & quod statutum ipsum alias sub vi præcepti maneat in vigore suo; absolutionem autem illorum, qui ante sublationem huiusmodi pœnam incidunt, eandem committimus plebanis, vt eisdem, & qui in posterum contra constitutionem prædictam venerint, iniungant stare ad modum pœnitentium ante fores ecclesiæ tribus diebus dominicis, vel festiuis, quando maior adest populi multitudo, eosque, qui in hoc contumaces extiterint vel rebelles, puniant ipsi plebani pro facultate cuiuslibet, in aliqua pœna pecuniaria competenti, custodi ad fabricam nostræ ecclesiæ cathedralis Saltzburgi sub certo testimonio assignanda. Et quod circa eosdem plebanos in singulis capitulis & Synodis tam nostris, quam archidiaconorum nostrorum, de hoc inquisitio diligens habeatur, & ad nostram notitiam perferatur plebanorum negligentia in hac parte.

CONCILIVM MOGVNTINVM,
QVO SVB PRÆSIDIO PETRI MOGVNTINI
archiepiscopi iussu pontificis tractata est causa Templariorum, anno Domini MCCCX. tempore Clementis papæ V.

NOTA.

^a *Concilium.*] Qua occasione quaque de causa hæc Synodus Moguntinæ congregata, & quid in ea gestum fuerit, ex manuscripto quodam codice Nicolaus Serarius lib. 5. in historia Petri archiepiscopi

Causa & acta habiti Concilii.

Concil. Tom. 28.

Ttt ij

refert his verbis: Anno 1310. ante Viennense Concilium (in quo Clementinas edidit Clemens quintus) Concilium habuit secunda, tercia & quarta ferias post dominicam Iubilate idem dominus Petrus provinciale, in quo statutorum provincialium ex antiquioribus Synodis compendium collegit, cuius vix paucula supersunt: & Romani pontificis iussu tractata est Templariorum causa.

Extant edita in statutis.

Comparuit autem in Synodo, quemadmodum refert manuscriptus liber, Hugo comes Siluestris & Rheni, qui morabatur in Grumbach prope Meysenheim cum viginti fratribus, sub habitu ordinis prope armatis. Hi omnes, non quidem vocati, sed vltro & subito in concessum patrum irrumpunt, omnibus attonitis. Archiepiscopus viros considerans, ac violentiam timens, placide iubet, commendator vi sedeat, & si quid habeat in medium afferendum, vt depromat. Qui clara & libera voce exorsus: se suosque confratres, inquit, intellexisse, hanc Synodum sui ordinis delendi gratia potissimum congregatam, ex commissione Romani pontificis. Enormia enim quedam scelera, & plusquam ethnica flagitia, illis obici, que in priuato designarent, quod ipsis sane esset grauissimum & intolerabile: maxime quod non ordinarie auditi nec conuicti condemnarentur. Quare coram ista patrum congregatione se appellare & prouocare ad futurum pontificem, eiusque vniuersum clerum: publice quoque protestari, eos qui propter talia flagitia alibi igni traditi essent & combusti, constanter pernegasse, se quidquam eorum designasse, atque in ea confessione tormenta & mortem perpeffos. Imo Dei optimi maximi singulari iudicio & miraculo eorum innocentiam comprobata, quod alba chlamydes ac rubricata cruces igni non potuerunt absumi. Archiepiscopus his auditis, ne tumultus suboriretur, protestationem eorum admisit, seque cum Romano pontifice acturum respondit, vt quieti esse possint: atque ita ad propria sunt dimissi. Postea vero Petrus aliam commissionem obtinuit, iuxta quam procedens, predictos censuit absoluedos, actum anno 1311. Kalendis Iulii, vt Nauclerus ex quodam Iacobo Moguntino tradit. Habuisse autem archiepiscopum Moguntia Concilium provinciale anno 1313. refertur in manuscripto: sed quia idem prioris mentionem non fecit, videtur vnum & idem.

